

西
巖
集



膳錄監生臣馮克鞏

膳錄監生臣董誠

欽定四庫全書

西巖集卷四

元 張之翰 撰

七言古

題呂四平山中吟

華陽深處神仙住不是神仙不知處以詩換骨者何人
兩甕先生七十孫童顏鶴髮春風好自種梅花拾瑤草
渠欲學之先學心寒泉玉巖山中吟世間俗事無一字
纔有一字不相似

張正甫太常送山水硯屏以長歌謝之

白雲從何來落此石硯屏當時一披拂澹白繚深青宗
家奉常不惜寶重封抱送來吾扁我方直院歸一洗老
眼明寒蟾潛光壁月窟暝禽倒影金星泓畫工有筆難
點綴紫潭無塵自清泠君不見歐陽有以紫石名子美
聖俞嘗辯爭東坡又有月石風林橫子功純父皆題評
感君盛德無以報竟日閣筆詩不成試從歐梅蘇范為
乞靈但覺山水盡與洪濤傾倚天絕壁開新晴

題林丹山詩軸因以餞之

武夷丹山最巔沔蒲陽壺山亦孱顏林居興化翁建安
不取壺山取丹山問君何時定中原兩山俱不能躋攀
千篇難買一綫官黃金臺下空盤桓雪華如掌風力酸
扣門乞詩若飢寒布囊包裹琳琅玕其如南人北士往
往相譏訕我思君家逋仙舊隱西湖間至今寒梅疎竹
無人看湖光綠可飲山色秀可飡便號孤山復何難何
必計較壺與丹作詩一笑君當還

詹學士送簞

移家初自淮海歸桃笙蘄簞皆棄遺集賢學士無長物
送此六尺黃琉璃清寒氣骨帶冰雪橫斜紋理含風漪
飛蠅側目不敢下餓蚤失足無所依竹夫人衰專房寵
班婕妤興團扇悲安排赤藤之床白石枕與我日夕生
涼颼世間殘暑休相欺

得朱文公帖

辦香走謁文公祠夜夢光焰生屏帷起來諸生送此帖

但見字行糊塗墨淋漓初讀未盡曉再辨始識之前書
德符觀魚之雅句後書陳朝說琴之遺辭行雲流水有
徐疾春蛇秋蚓無雄雌幽深不減武夷曲蕭散殆似感
興詩嗚呼世人剽公之書竊公學便謂傳解之外無他
為區區字畫一技爾信意落筆乃爾竒我思昔賢全才
何所不可施白雲在天恨莫追空抱遺墨中原馳神物
與我相護持不爾恐逐雷霆飛

讀郝陵川使宋集因題其後

我從少年見陵川筆力扛鼎思湧泉中流飛龍飛上天
黃金虎節光赫然豈期宋人羈留十七春仰面見天不
見人大兵問罪壓江濱片帆纔離古儀真白頭歸來孰
當國上有花門下刀筆九重無由表忠赤更比子卿堪
歎息乾坤英氣死彌烈明月夜光留此冊夜來燭下讀
未徹一陣黑風吹燭滅

悲鄰雞

鄰家老翁善祝雞十十五五相因依忽得一雞愛雄奇

金背鐵距錦彩衣橫行羣中事凌欺衆雞欲鬪力莫支
鳴聲訴翁無已時老翁磨刀怒殺之羣雞飲啄爭熙熙
意謂此雞墮我機我祝羣雞飽當飛老翁朝朝抱長饑
殺心既啟吁可悲

食松蕈詩

春雲淡淡春煙濃笋輿直入春山中山人殷勤具盤蕈
云是生長深岩巨壑千歲不老之蒼松金丁玉笠忽到
口已與茯苓琥珀爭長雄初嚼帶寒雨再嚼生清風三

嚼五嚼六七嚼一洗滿腹葷羶空既不能招首陽採薇
子又不能呼商山茹芝翁石泉煮茶三嚥罷但覺排雲
直氣拍塞乎孤胸歸來偃卧一榻上清夜有夢攀髯龍
人間此味豈易逢絕口不敢談其功却恐笑殺癡兒童

題昭君圖

漢元宮中誰第一最是王嬙好顏色當時無金買畫工
按圖遠嫁悔何及黃沙白草塞外情酸風吹入琵琶聲
死為萬里異鄉鬼至今青塚愁雲生君王枉殺毛延壽

似此妬賢人儘有又有過於畫圖手

題明皇擊毬圖

天寶宮中無事時乘驢擊毬共娛嬉此風既扇不復止
流傳後來爭習之蜀王常列錦步障敬宗曾得罨畫衣
自稱狀元惟數僖直把西川節度賭與陳餅師九重深
居本無為一舉一動關安危想當莎場縱奔蹄霹靂應
手神珠馳萬金聖躬豈暇顧迴頭一笑雙娥眉黃髯老
番雖狎亦可嗤奏言旁觀何太遲只圖眼前一霎樂不

管身後十年悲馬嵬坡下死別離連雲道上生嶮巖嗟
嗟若輩無所施空留畫樣令人思見畫不覺成新詩

題秋山獵豹圖

霜風烈烈百草枯鼓山山頭日向晡石頭高低路崎嶇
荒林叫狸號妖狐有物突出驚前驅大于雄彪小于菟
繡衣將軍臂彫弧霹靂一發金僕姑金團袍裂一大呼
老涎淋漓血模糊從兒載錦滿後車迴頭隱霧空巖隅
英雄歸來膽包軀快如勅敵力驅除鼓笳宴酣得意餘

眼高四海空江湖看君他年笑平吳凌煙千秋認眉鬚
未必志在秋山圖

題盤谷圖

盤谷非昌黎當時誰能寫其真李愿非昌黎後世何以
知其人今學愿也隱雖無韓之文何處不有盤溪之水
盤山雲

題趙錄判星丸漏圖

唐人鐵澀藏集賢越僧銅製費有年孔壺為漏箭為刻

後世其孰知其然趙君星丸本金丸變十二數餘百千
我生雖不窮此法意與徐池二州之漏相後先既不能
勒銘擬坡仙又不能作賦追樊川還君此圖三太息世
間何術無心傳但患學者未至真忘筌

題惠氏遇仙圖

謂遇洞
賓也

我昔聞呂仙本人而天儒而玄袖中三劍常在手擔頭
兩甕不息肩或朝遊江湖或暮歌市鄺東林毆蛟燭已
滅曲江飛鳥月正娟平生妙處少傳法只有趙靈郭鈍

相後先惠公復何功而有觀燈緣長風萬里氣一息背
負直入西南天解衣圓明作酒錢酒盡却下峨眉巔歸
來墮井呼不起有淚迸落巖之邊豈期身示三絕句石
榴皮草猶蜿蜒及公發殯一大悟便謝浮世凌飛烟鳴
呼至人雖死本無死安知此去不復還我當為汝細撿
興化寺中之供簿汝亦為我再尋垂虹亭上之遺篇此
詩此畫莫漫傳他時儻見雙雲輶再拜問公然不然

送張禮部李兵曹奉命開河之行兼簡高和之

漕副

鄆州西北低復起中有清河走清泚青龍折身東入海
不接御河餘百里我朝混一凡幾載南北舟車日瑣委
風帆咫尺不得到費盡人牛不停軌九重有詔許開鑿
官不選材何所倚寓軒尚書今禮部兵曹郎中前御史
請行復有馬漕臺在魯諸公宜辦此古來水運非不多
良法相傳今有幾褒斜砥柱固莫論邗溝汴渠差可擬
欲通尾尾萬舳艫先看粼粼一篙水功成事辦民不疲